

## სსიპ „საქართველოს მედიატორთა ასოციაციის 2021 წლის 18 დეკემბრის მორიგი საერთო კრების რეგლამენტი

### მუხლი 1. რეგლამენტის არსი

- 1.1. რეგლამენტი ადგენს ასოციაციის წევრების მიერ, ასოციაციის საერთო კრებაზე უფლებამოსილებათა განხორციელების წესსა და პროცედურას.

### მუხლი 2. კრების ადგილმდებარეობა და დრო

- 2.1. საერთო კრება იმართება 2021 წლის 18 დეკემბერს დღის 14:00 საათიდან 17:00 საათამდე პერიოდში, მისამართზე: ქ. თბილისი, თელავის ქუჩა #20, სასტუმრო „შერატონ გრანდ მეტეხი პალასი“ .

### მუხლი 3 . კრების მიმდინარეობა

- 3.1. საერთო კრების გახსნამდე, 14:00 საათზე იწყება მონაწილეთა რეგისტრაცია და გრძელდება იმავე დღის 14:40 საათამდე. კრების დარბაზის შესასვლელთან განთავსებულია სარეგისტრაციო მაგიდები, სადაც საორგანიზაციო კომისიის წევრები ამოწმებენ წევრთა ვინაობას, მოქალაქის პასპორტის ან პირადობის მოწმობის წარმოდგენის საფუძველზე, წევრთა ერთიან სიასთან შედარებით. წევრის მიერ სიაში ხელმოწერით და საორგანიზაციო კომისიის წარმომადგენლის მიერ მანდატზე ხელმოწერით დასტურდება წევრის კრებაზე მონაწილეობის უფლება, რის შემდეგაც წევრს გადაეცემა მანდატი, რომელიც დამოწმებულია ორგანიზაციის ბეჭდით. ასოციაციის წევრი, რომელმაც გაიარა რეგისტრაცია, კრებაზე დაიშვება მანდატის წარდგენის შემდეგ.
- 3.2. კრება უფლებამოსილია თუ მას ესწრება ასოციაციის წევრთა უბრალო უმრავლესობა. ქვორუმის არარსებობის შემთხვევაში, იმავე დღეს 15:00 საათზე, მოიწვევა განმეორებითი საერთო კრება, რომელიც უფლებამოსილია მიუხედავად დამსწრე წევრთა რაოდენობისა. განმეორებითი კრების მოწვევის შემთხვევაში კრების დღის წესრიგი რჩება უცვლელი და განმეორებითი რეგისტრაცია ცხადდება

15:00 საათზე და სრულდება 15:30 საათზე. განმეორებით კრების იმავე დღეს მოწვევის შემთხვევაში, ხელმეორედ რეგისტრაციისას არ გაიცემა ახალი მანდატი და ძალში რჩება პირველი რეგისტრაციის დროს გაცემული მანდატი.

- 3.3. საორგანიზაციო კომისია 14:30 საათზე, ხოლო განმეორებითი კრების შემთხვევაში 15:30 საათზე აჯამებს კრებაზე მოსულ წევრთა რაოდენობას და სამანდატო კომისიის თავმჯდომარე ამ ინფორმაციას გადასცემს კრების თავმჯდომარეს. რეგისტრაცია პირველი კრების შემთხვევაში 14:30 საათზე, ხოლო განმეორებითი კრების შემთხვევაში 15:30 საათზე წყდება.
- 3.4. მორიგი საერთო კრების გახსნამდე კრების თავმჯდომარე, კრების მონაწილეებს აცნობს
- 3.5. ასოციაციის წევრთა მთლიან და დამსწრე წევრთა რაოდენობას, რის შემდეგაც აცხადებს უფლებამოსილია თუ არა კრება შეუდგეს მუშაობას.
- 3.6. რეგისტრაცია გავლილი ასოციაციის წევრი, რომელიც დატოვებს შენობას, კრებაზე უკან დაიშვება მხოლოდ მანდატის და პირადობის მოწმობის წარმოდგენის საფუძველზე.
- 3.7. რეგისტრაციის დასრულების შემდგომ კრებაზე დაგვიანებით მოსული წევრები კრებაზე არ დაიშვებიან.

#### **მუხლი 4. ასოციაციის წევრთა ერთიანი სია**

- 4.1. ასოციაციის წევრთა ერთიანი სია ასოციაციის თავმჯდომარის მიერ გადაეცემა საორგანიზაციო კომისიას მანდატებთან ერთად, რის შესახებაც დგება შესაბამისი ოქმი.
- 4.2. სარეგისტრაციო სიის ყოველი ფურცელი ბეჭედდასმულია და შეიცავს წევრის სახელსა და გვარს. წევრის სახელის გასწვრივ მოცემულია ხელმოწერის გრაფა.
- 4.3. რეგისტრაციის დასრულების შემდეგ, საორგანიზაციო კომისია უზრუნველყოფს რეგისტრაციაგავლილ წევრთა რაოდენობის დათვლას. შედეგად დაიხურება შეუვსებელი გრაფები და მის გასწვრივ დაისმება ლათინური ნიშანი - „Z“.
- 4.4. ზემოაღნიშნული პროცედურების გავლის შემდეგ, სარეგისტრაციო სიები საორგანიზაციო კომისიის მიერ გადაეცემა თავმჯდომარეს რის შესახებაც დგება შესაბამისი ოქმი.

#### **მუხლი 5. კრების მიმდინარეობის პროცედურები**

- 5.1. კრებას ხსნის და უძღვება ასოციაციის თავმჯდომარე, რომელიც:
  - 5.1.1. აცხადებს კრების სხდომის გახსნას და დასრულებას;
  - 5.1.2. უძღვება საკითხის განხილვას. საკითხის შინაარსიდან გამომდინარე სიტყვას აძლევს და ჩამოართმევს გამომსვლელს. გამომსვლელის სიტყვის

ხანგრძლივობა არ უნდა აღემატებოდეს 2 წუთს, რომელსაც შეიძლება კრების თავმჯდომარის გადაწყვეტილებით დაემატოს 1 წუთი;

5.1.3. უზრუნველყოფს ამ რეგლამენტისა და საერთო კრებაზე წესრიგის დაცვას;

5.1.4. კენჭისყრაზე აყენებს საკითხს და აცხადებს კენჭისყრის შედეგებს;

5.1.5. ამ რეგლამენტით გათვალისწინებულ შემთხვევაში სიტყვას ჩამოართმევს გამომსვლელს, სხდომათა დარბაზს ატოვებინებს წევრს, რომელიც არღვევს წესრიგს;

5.1.6. საჭიროების შემთხვევაში აცხადებს შესვენებას;

5.1.7. ახორციელებს ამ რეგლამენტით მისთვის მინიჭებულ სხვა უფლებამოსილებებს.

5.2. კრების თავმჯდომარის გადაწყვეტილებით საკითხის განხილვის მიმდინარეობისას განხილვაში მონაწილე გამომსვლელები უნდა ჩაეწერონ გამომსვლელთა სიაში, კრების სამდივნოს საშუალებით, ახალ საკითხზე გადასვლამდე.

5.3. ერთიდაიმავე გამომსვლელისათვის რამდენჯერმე სიტყვის მიცემის საკითხს წყვეტს კრების თავმჯდომარე საკითხის შინაარსიდან გამომდინარე;

5.4. საერთო კრებაზე საკითხის განხილვა წარმოებს კრების დღის წესრიგით დადგენილი რიგითობის შესაბამისად.

## **მუხლი 6. ღია კენჭისყრის წესი და პროცედურა**

6.1. ხმის დამთვლელი კომისია, ხოლო მის არჩევამდე საორგანიზაციო კომისია, ღია კენჭისყრის დროს ვალდებულია დაითვალოს მიღებული ხმები, რომლებიც კომისიის მიერ შეჯამდება და მოხსენდება კრებას.

6.2. ხმის დამთვლელი კომისია ღია კენჭისყრის დროს განთავსდება სექტორების მიხედვით და თითოეული წევრი ვალდებულია დაითვალოს სექტორის მიერ მიღებული ხმები, რომლებიც კომისიის მიერ შეჯამდება და მოხსენდება კრებას, რის თაობაზეც დგება შესაბამისი ოქმი.

6.3. ღია კენჭისყრის დროს პირველად ცხადდება საკითხს ვინ უჭერს მხარს, შემდეგ ვინ არის წინააღმდეგი და ბოლოს თავი ვინ შეიკავა.

6.4. მედიატორთა ასოციაციის საერთო კრება ღიაა და კენჭისყრა მიმდინარეობს გამჭვირვალედ.

## **მუხლი 7. რეგლამენტის დებულებების დაცვა**

7.1. რეგლამენტის დარღვევისთვის წევრის მიმართ შეიძლება გამოყენებულ იქნას ზემოქმედების შემდეგი ფორმები:

- 7.1.1. გაფრთხილება;
  - 7.1.2. კრებაზე სიტყვის ჩამორთმევა;
  - 7.1.3. სხდომათა დარბაზის დატოვება.
- 7.2. კრების თავმჯდომარე უფლებამოსილია წევრს ჩამოართვას ხმა თუ იგი:
- 7.2.1. კრებაზე სიტყვით გამოდის სხდომის თავმჯდომარის ნებართვის გარეშე;
  - 7.2.2. აჭარბებს რეგლამენტით დადგენილ დროს ან იმ დროს, რომელიც მას გაუგრძელეს სხდომაზე დამსწრეთა ხმების უბრალო უმრავლესობით.
- 7.3. კრების თავმჯდომარე უფლებამოსილია გააფრთხილოს წევრი, რომელიც:
- 7.3.1. ამ მუხლით და რეგლამენტის 5.1.2. და 5.1.5. პუნქტით გათვალისწინებულ შემთხვევებში სიტყვის ჩამორთმევის შემდეგაც განაგრძობს გამოსვლას;
  - 7.3.2. სიტყვით გამოდის მიკროფონის გარეშე;
  - 7.3.3. ჩაიდენს ქმედებას, რომელიც იწვევს რეგლამენტით გათვალისწინებული წესით წარმართული სხდომის შეფერხებას;
- 7.4. კრების თავმჯდომარე უფლებამოსილია დარბაზი დაატოვებინოს იმ წევრს:
- 7.4.1. რომელმაც იმავე სხდომაზე მიიღო ორი გაფრთხილება და ხელს უშლის კრების მიმდინარეობას;
  - 7.4.2. რომელიც სხდომათა დარბაზში გამოცხადდა იარაღით ან სხვა კანონით აკრძალული ნივთით;
  - 7.4.3. რომელიც ხელს უშლის საერთო კრების მიმდინარეობას ან ამგვარი ქმედებისკენ მოუწოდებს სხვა წევრებს.

## **მუხლი 8. საერთო კრების ოქმი**

- 8.1. ასოციაციის საერთო კრების მსვლელობაზე დგება ოქმი, რომელსაც ხელს აწერს კრების თავმჯდომარე.

## **მუხლი 9. დასკვნითი დებულებები**

- 9.1. წინამდებარე რეგლამენტი შედგენილია ერთ ეგზემპლარად;
- 9.2. ასოციაციის წევრებს უფლება აქვთ მოითხოვონ და მიიღონ ასოციაციის სათანადო წესით დამოწმებული რეგლამენტის ასლი.